



PROOEMIUM.



Decem sunt, et quod excurrit temporis, anni, ex quibus popularium meorum vnus, dum medicam capessebat lauream, MARTINVS FOERSTER, vtriusque Silesiae nostrae fontes medicatos generatim recensuit, et ad summa quaedam genera, mixtionis adfinitati conuenientia, reduxit. Cuius haud ignobili exemplo dein excitati aliquot clarissimi viri, iidemque populares mei, in eodem perrexerunt tramite, et, ne tot opum, a natura communi nostrae patriae munifice concessarum, memoria denuo oblitteraretur, singularibus commentariolis speciatim varias diuersorum istorum generum aquas medicatas recensuerunt.



runt. Eo consilio prodierunt hic foras dissertationes IOSEPHI GEORGII GREVPNERI de *fontibus Silesiacis alcalinis*; ANTONII WENTZEL de *fontibus sulphureis*; ALOYSII ALBERTI de *fontibus medicatis martialibus simplicibus*; IOSEPHI GIESCHE, IOSEPHI NEVGEBAYER, et FRANCISCI KVRTZII de *fontibus alcalino-martialibus*; tandemque IMMANVELIS GOTTLOB MENTZELII de *acidulis Flinsbergensibus*. Ego vero, ex acidularum alcalino-martialium classe superesse quasdam animaduertens, quas iam supra honorifice nominatus MARTINVS FOERSTER attigit, nemo vero alius ex professo exposuit, nolui, quae patriae debeo, deesse officiis. Proinde hos ipsos fontes medicatos, quibus benefica natura *Saganensis* et *Glogouiensis* ducatus confinia instruxit, vobis, lectores beneuoli, in tantum curate descriptos sisto, in quantum omnia, quae huc faciunt, partim ex publicis, partim ex priuatis amicorum relationibus rescire potui.